



26 HEPETEMA 2023

HEI PĀNUI WAVE ATU

E karangahia ana ngā kaiwhakawā mō ngā Tohu Pukapuka o Aotearoa mā ngā Tamariki me ngā Taiohi

E tono ana ngā kaiwhakahaere o ngā Tohu Pukapuka o Aotearoa mā ngā Tamariki me ngā Taiohi kia tuku tonono mai ngā mema me ngā kaitautoko o te hapori mātākōrero tamariki e hiahia ana ki te tū hei kaiwhakawā o ngā tohu 2024.

Kua tuwhera ngā tono kaiwhakawā ki te hunga katoa e whai ana i ngā tohu me ngā wheako tika, ā, ka kati hei te 25 o Oketopa.

E ono ngā wāhanga ka whiwhi tohu: Pukapuka Whakaahua, Pakiwaitara Tamariki, Pakiwaitara Taiohi, Tuhinga Pono, Pikitia Whakaari me te Reo Māori. E rima ngā kaiwhakawā ka tohua mō ngā wāhanga reo Pākehā me te reorua, ā, e toru anō ngā kaiwhakawā ka whiriwhiri i te Tohu o Te Kura Pounamu, ka whakawhiwhia mō ngā pukapuka i tuhia katoatia (i whakamāoritia rānei) ki te reo Māori.

E pōhiritia ana ngā tono mai i te hapori mātākōrero tamariki me ngā mema tūmatanui whai wheako whitake. Ko ētahi o ngā kaiwhakawā o mua he kaihoko pukapuka, kaiwhakaputa pukapuka, kaituhi, kaitiaki pukapuka, kaiako, ngaio, kaiarotake me ngā kaituhi rangitaki. E akiaki ana ngā kaiwhakahaere kia tuku tonono mō ngā paewhiri e rua mai i ngā kaitono e tino mōhio ana ki te ao Māori me te reo Māori, otirā me mātatau ngā kaiwhakawā o te tohu o Te Kura Pounamu ki te reo.

Hei tā Nicola Legat, upoko o Te Ohu Tiaki i Te Rau Hiringa, e whakahaere ana i nga tohu, he mahi nui te whakawā i ēnei tohu, engari he mahi hira, he mahi whai hua hoki. “Karekau pea tētahi mea pai ake i te āta aromatawai i ngā pukapuka pai rawa atu o Aotearoa o te tau nei mā te rangatahi, me te whakanui i te hira o ngā tuhinga pai rawa mā te taiohi,” ko tāna.

E ai ki a Nicola Daly, te kaiwhakahui i ngā kaiwhakawā o te 2023, he ngaio hoki e whakaako ana i ngā akoranga mātākōrero tamariki, mā te noho ki te paewhiri e whai tirohanga ai koe ki ngā tūmanako me ngā wawata o ngā kaituhi, ngā kaiwhakaahua, ngā kaiwhakamāori, me ngā kaiwhakaputa mō ā tātou tamariki, rangatahi hoki. “He arawātea ki te āta whakawhiti kōrero mō te āhua e kairangi ai ngā mātākōrero tamariki; ki te tuku whakaaro, otirā ki te wero i te hirikapo. Ko tā ngā paewhiri i te tau 2023 he pānui, ā, he pānui anō i ngā tāpaetanga katoa, kātahi ka tuku i ō rātou whakaaro maha hei whakatau i

ngā whiringa whāiti me ngā whiringa toa. “Koinei te moemoea o te tangata e ngākaunui ana ki te pānui pukapuka!”

Ka whiriwhiri ngā kaiwhakawā reo Ingarihi i ngā tono, āhua 150 te rahi, kei ngā wāhanga e rima. Ka kōwhiri rātou, atu ki te rima whiringa whāiti o ia wāhanga, ā, atu hoki ki te rima whiringa whāiti o te Pukapuka Hou Pai Rawa, kātahi ka whakaingoatia te toa o ia wāhanga. Ka kōwhiri hoki te paewhiri reo Māori, atu ki te rima whiringa whāiti (āhua 15 ngā kaitono) me te toa o te Tohu o Te Kura Pounamu. Ka noho haepapa tonu ngā paewhiri e rua ki te whakatau ko wai te Pukapuka o te Tau o Margaret Mahy.

Ka tuwhera ngā tono mo ngā Tohu Pukapuka o Aotearoa 2024 mō ngā Tamariki me ngā Taiohi ā te 16 o Noema, ā, ka tīmata ngā kaiwhakawā ki te pānui i waenganui o te marama o Hakihea. Ka whakaatuhia ngā whiringa toa i te tīmatanga o te Hune 2024, ā, ka tū te hui whakamānawa i te tīmatanga, i waenganui rānei o te Ākuhata i Te Whanganui-a-Tara.

Ka taea te tikiake i ngā puka tono, ngā kōrero mō te tukanga whakawā me ngā mahi a te kaiwhakawā i te [paetukutuku](#) a Te Ohu Tiaki i Te Rau Hiringa, me tono rānei mā te tuku īmēra ki childrensawards@nzbookawards.org.nz. Me tuku i ngā tono i mua i te 5 karaka i te pō o te Wenerei te 25 o Oketopa, ā, me tuku hoki i tētahi tātai pūmanawa poto e whakaatu ana i ngā mahi a te kaitono e tika ana mō te tūranga kaiwhakawā.

Mā Te Ohu Tiaki i Te Rau Hiringa te paewhiri kaiwhakawā e kōwhiri. Kei roto i taua ohu ko ngā māngai o te Te Rau o Tākupu, Te Puni Kaituhi o Aotearoa, Te Rau Herenga o Aotearoa, me Booksellers Aotearoa.

Nā te mākohakoha, te ngākaunui me te wawata o ngā kaituku pūtea me ngā kaitautoko i whai huruhuru ai ngā Tohu Pukapuka o Aotearoa mō ngā Tamariki me ngā Taiohi: Toi Aotearoa, HELL Pizza, Wright Family Foundation, Te Rau Herenga o Aotearoa, Te Kaunihera o Pōneke, Te Puni Kaituhi o Aotearoa, me Nielsen Book.

TE MUTUNGA

Anei te hononga ki ētahi atu kōrero i te paetukutuku a Te Ohu Tiaki i Te Rau Hiringa:

<http://www.nzbookawards.nz/new-zealand-book-awards-for-children-and-young-adults/news/>

I whakaputaina mō Te Ohu Tiaki i Te Rau Hiringa e:
Belinda Cooke, manager@nzbookawards.org.nz, waea 021 481044

Nā Tamati Waaka te pānuitanga pāpāho i whakamāori